

Vasco da Gama

Ons [kos](#) sou darem baie vaal, vervelig en smaakloos gewees het as dit nie vir heerlike kruie en speserye was nie. Om nie eens van die belangrikheid van sout en peper as geurmiddels te praat nie! Danksy ontdekkingsreisigers soos **Vasco da Gama** kan ons vandag met kleur en geur van reg oor die wêreld op ons speseryrak spog. En gelukkig is peper darem nie meer **peperduur** nie!



Nou waarom was peper dan so verskriklik duur? Sedert die antieke tye was peper (ook “die koning van speserye” genoem) nog altyd die gewildste spesery in die wêreld. Boonop het dit ‘n sentrale rol in die [medisyne](#) van antieke Indië en China gespeel. ¹

In daardie tyd is peper ook as geldeenheid gebruik. **Lospryse, bruidskatte**, huur en selfs **belasting** is met peperkorrels betaal! ²

Drome van die verkryging van speserye, veral peper, het Vasco da Gama (omstreeks 1469-1524) om die Kaap van [Afrika](#) na die [Indiese Oseaan](#) en [Christopher Columbus](#) (1451-1506) oor die [Atlantiese Oseaan](#) na die Nuwe Wêreld gedryf. ³



Danksy dié Portugese ontdekkingsreisiger, wat drie groot **verkenningsstogte** onderneem het en ‘n seeroete tussen Europa en Indië via die Kaap die Goeie Hoop gevind het, het die wêreld eensklaps “groter” geword. As dit nie vir Da Gama en vele ander dapper seevaarders van verskeie lande was nie, sou ons ook nooit sekere dele van die [aarde ontdek](#) en bewoon het nie.

Seewater kleintyd al in sy are

Dit is nie presies seker wanneer Vasco da Gama gebore is nie, maar daar word gereken dat dit waarskynlik in 1460 was. Sommige bronne meen weer hy is in 1469 gebore. Ons weet egter wel dat hy sy eerste lewenslig in Sines aan die kus van die Alentejo-provinsie in die suidweste van Portugal aanskou het. Met die

seebriesie wat elke dag deur sy hare gewaai het en die smaak van die soutwatersproei op sy tong het Vasco sommer van kleins af 'n liefde vir die see ontwikkel. ⁴

Vasco was die derde van vyf seuns en hy het ook 'n suster gehad. ⁵



Da Gama se pa, Estêvão da Gama - self 'n [ontdekker](#) wat later tot ridder geslaan is - het 'n baie suksesvolle militêre loopbaan gehad, onder meer as bevelvoerder van die **fort** in Sines. Hy was ook die burgerlike goewerneur van Sines rondom die tyd van Vasco se geboorte. Vasco se ma, João Sodré, het uit 'n **welgestelde** (ryk) familie gekom. ²

Vasco is nie net kleintyd in die kuns van **navigasie** en skeepvaart **touwys gemaak** nie, maar hy het ook 'n goeie skoolopleiding ontvang. Vasco se skool was in 'n groter dorpie genaamd Évora, sowat 110 km van Sines. Hier het hy **gevorderde** wiskunde (moeiliker wiskunde) geleer en die beginsels van navigasie bestudeer. Teen vyftien was hy vertrouwd met handelskepe wat in die hawe vasgemeer was en op 20-jarige ouderdom was hy reeds die kaptein van 'n skip! ⁶



In 1492 kry Vasco sy eerste opdrag van koning John II van Portugal om Franse skepe in die hawe en die kus van Algarve oor te neem uit **weerwraak** vir die Franse **seerowers** se aanvalle op Portugese skepe wat slawe vervoer het. Die digter Garcia de Resende skryf in sy boek *Crónica de D. João II* ('Die verhare van Koning Johan II') dat Vasco da Gama baie braaf (dapper) en suksesvol was. ⁷

Die era van verkenning

Die era van verkenning vind in dieselfde tyd as die [Renaissance](#) plaas, vanaf vroeg in die 15de eeu (1400's) tot die 17de eeu (vroeg 1600's). Dié era kan in twee dele verdeel word: die ontdekking van seeroetes en **kolonisering**.

Tydens die eerste gedeelte was die doel van die reise om nuwe seeroetes na die Ooste te vind. Met dié reise het die seevaarders plekke soos die Amerikas (Noord-

en Suid-Amerika) ontdek wat hulle die Nuwe Wêreld genoem het. Tydens die tweede gedeelte van hierdie era fokus die Europese lande op die kolonisering van die Amerikas, Afrika, asook Australië en Nieu-Seeland.⁸

Portugal se rol in die ontdekking van die wêreld

Behalwe dat die Europeërs graag die Christendom wou uitbrei, was handel die grootste rede waarom dit vir hulle belangrik was om goedkoper maniere te vind om **waardevolle** (duur) dinge soos sy, porselein, ivoor en veral speserye in die hande te kry.

Portugal was grootliks verantwoordelik vir die bekendstelling van [slawehandel](#) aan die Amerikas deur kolonies op voorheen onbewoonde eilande te vestig wat as versamelpunte vir gevangenes en **kommoditeite** (goedere) gedien het.⁹



Dit klink dalk vandag vir ons vreemd om te dink dat speserye só belangrik was dat 'n hele nuwe seeroete gevind moes word, maar in daardie tyd was speserye skaars en baie waardevol. Die rede vir die hoë koste was die feit dat baie land- en seeroetes deur Turkye en Arabië beheer is. 'n Mens moes belasting betaal vir die voorreg om enigiets op dié roetes te [vervoer](#), en die belasting was só hoog dat handelaars se **wins** al hoe minder geword het. Die oplossing was om 'n **regstreekse** (direkte) roete tussen Europa en die Ooste te vind.¹⁰



Portugal was reeds teen die middel van die 15de eeu die wêreldvoorloper op die gebied van navigasie, die bou van skepe en **kartografie**. Hierdie voorsprong kan toegeskryf word aan, onder meer, die belangstelling en **geesdrif** wat die leiers van Portugal in skeepvaart gehad het.

Prins [Hendrik, die Seevaarder](#) (1394-1460), het byvoorbeeld die beste **kartograwe, aardrykskundiges, astronome** en navigators aangestel om 'n **seevaartskool** in Portugal te begin. Boonop het hy hierdie ontdekkingstogte vir 40 jaar lank finansieel ondersteun. Portugal het baie winsgewend handel gedryf

met slawe en [goud](#), maar die suidelike kus van die Afrika-**kontinent** het onbekend gebly vir die Europeërs, totdat Da Gama die roete tussen Portugal en Indië ontdek het. ¹¹



Vasco da Gama se eerste ekspedisie vanaf Lissabon na Afrika

Dit was eers in 1487 toe die Portugees [Bartolomeu Dias](#) om die suidpunt van Afrika gereis het, dat hy vasgestel het dat die Atlantiese en Indiese Oseaan nie deur land omring word nie en dat 'n seeroete tussen Europa en Indië 'n moontlikheid is. Dias het tot by Kwaaihoek in vandag se [Oos-Kaap](#) gereis voordat hy deur die **bemanning** gedwing is om terug te draai omdat daar nie meer baie kos aan boord was nie. ¹²

Die speseryroete

Het jy geweet daar is 'n plek in die [Wes-Kaap](#) wat ook Spice Route (speseryroete) genoem word?

Wanneer handelskepe in die **jaar toet** in die Kaapse hawe vasgemeer het, het seevaarders hul skeepshorings geblaas om hul aankoms aan te kondig - 'n geluid wat tot by die plase teenaan Paarl se berg gehoor kon word. Hierdie geluid het die boere van omliggende gebiede genooi om op hul perdekarre te klim om voorrade te gaan haal en handel te dryf.

Nou, hierdie groot plaas met die naam Spice Route is, soos in die ou tyd, 'n plek van samekoms van diverse (verskillende) ambagsmanne wat allerhande interessante goed maak of voorberei - 'n versameling van geure en 'n viering van 'n verskeidenheid kulture. Hier kry 'n mens 'n idee van die atmosfeer van die ouwêreldse handeldryf en gesellige samekoms van mense. ¹³



Spice Route

Maar terug na Vasco da Gama: Sedert antieke tye het **handel** 'n belangrike rol in mense se lewe gespeel. Wanneer ons iets koop, [ruil](#) ons een ding (gewoonlik geld) vir iets anders (kos, klere, 'n [fiets](#), [rekenaar](#), ensovoorts). Die produk wat ons in

die winkel koop, is die laaste skakel in 'n lang ketting van kopers en verkopers: van die verskaffer van [grondstowwe](#), tot die vervaardiger, dan groothandelaar en, laastens, die winkel. As die [goedere](#) wat ons koop van die buiteland kom, kan daar nog verskeie ander skakels (tussenpersone of -handelaars) tussenin wees. ⁶

Die reis van die goedere tussen al hierdie skakels in die ketting word 'n **handelsroete** genoem. In die geval van die speseryroete is die skakels die handelaars wat goedere van hawe tot hawe geneem en gekoop en verkoop het. Die belangrikste en winsgewendste goedere waarmee hulle handel gedryf het, was speserye. Dit is waar dié roete sy naam kry. ⁶

Reeds in 2000 v.C. het speserye soos kaneel van Sri Lanka en China hul weg langs die speseryroete na die Midde-Ooste gevind. Ander goedere is ook uitgeruil - vrage ivoor, sy, porselein, metale en skitterende edelstene het groot winste opgelewer vir die handelaars wat bereid was om die gevaarlike seereise aan te durf.



Kosbare goedere was egter nie die enigste ruilmiddel nie. Die uitruil van kennis was ewe belangrik: kennis van nuwe volke en hul godsdienste, tale, kundigheid, asook kuns- en wetenskaplike vaardighede. Die hawens langs die speseryroete was 'n mengelmoes van uiteenlopende idees en inligting. Elke skip wat 'n vrag waardevolle goed afgelaai het, het weer 'n vrag nuwe kennis oor die see na die volgende hawe geneem. ⁶

Die speseryroete is dus die naam van die netwerk van seeroetes wat die Ooste met die Weste verbind. Dit strek van die weskus van Japan, deur die eilande van Indonesië, rondom Indië tot by die lande van die Midde-Ooste - en van daar af oor die [Middellandse See](#) na Europa. Dit is 'n afstand van meer as 15 000 kilometer en, selfs vandag nog, is dit glad nie 'n maklike reis nie. ⁶

Hoewel daar op die [syroete](#) ook handel gedryf is met speserye, was hierdie roete oor die land. Die speseryroete was dus die seeroete.

Historiese reis na Indië

Tien jaar het verloop sedert Dias se reis om die suidelike punt van [Afrika](#) voordat koning Johan II in 1497 aan Vasco da Gama die opdrag gee om 'n seeroete tussen Europa en Indië te vind. Da Gama en sy 170 manskappe vertrek op 8 Julie 1497 uit Lissabon, Portugal se hoofstad, met die São Gabriel, São Rafael (beide skepe van 120 ton), die Berrio ('n 50 ton-**karveel**) en 'n 200-ton skip wat vrag vervoer het. ²



Saam met Vasco was sy broer Paulo, Bartolomeu Dias, en drie tolke - twee wat Arabies kon praat en een persoon wat 'n paar inheemse Afrikatale kon praat. Klippilare wat die ontdekkingsreisigers opgerig het om te wys dat hulle 'n sekere plek bereik het, is ook saamgeneem. Die vloot van vier skepe kies koers van Lissabon tot in Sierra Leone wat reeds aan die Portugesevaarders bekend was. Hierna vaar Da Gama in 'n suidwaartse rigting om die Atlantiese Oseaan oor te steek. In 'n poging om die slegte weer langs die kus van Afrika te vermy, sou hy soms 'n ompad van meer as 9 500 km vaar sonder om enige land te sien. ²

Hoogtepunte van Da Gama se historiese reis na Indië

- Julie 1497: Die skepe bereik die Kaap Verdiese Eilande waar Bartolomeu Dias die ekspedisie verlaat. Hy keer later na Portugal terug met goud en slawe wat gebruik sou word om vir verdere ontdekkingsreise te betaal. ¹⁴
- Oktober 1497: Nadat die skepe verby Sierra Leone gevaar het, stuur Vasco da Gama die **ekspedisie** in 'n suidelike rigting sonder om enige land te sien. Nadat hulle die ewenaar oorsteek, kom Da Gama die westelike winde teë wat Bartolomeu Dias gewaar het. ¹⁵
- Op 4 November, ná vier maande wat hulle geen land gesien het nie, gewaar die manne uiteindelik land. Ná sowat 10 000 km op see, het hul **krete** groot blydschap en dankbaarheid gebring. Vasco beveel dat die skepe in 'n **baai anker** gooi. Hy vernoem St. Helenabaai na Konstantyn die Grote se ma (Bahía de Santa Elena). Soos Dias, ontmoet Vasco en sy

bemanning ook die plaaslike Khoi-inwoners. Hulle sit hul reis ná 'n paar dae voort. ¹⁶

- Net soos Dias, het Da Gama ook gesukkel om verby die Kaap die Goeie Hoop te vaar. Dis eers ná verskeie probeerslae dat Da Gama en sy manskappe op 22 November 1497 daarin slaag om dié gevaarlike waters ongeskonde te **bevaar**. ¹⁷



Vasco da Gama by Kaap die Goeie Hoop

- By Mosselbaai verbrand hulle die voorradeskip Beirro omdat dit erg beskadig was.
- 16 Desember 1497: Op hierdie dag bereik hulle die Groot Visrivier waar Bartolomeu Dias jare terug omgedraai het. ¹⁸
- 25 Desember 1497: Nadat hulle 'n paar dae by die mond van die Groot Visrivier vertoef het, bereik die groep 'n plek naby die hedendaagse [KwaZulu-Natalse](#) kus wat hy Natalia doop omdat hulle dit op Kersdag gesien het. ¹⁹
- Januarie 1498: In die volgende paar weke vaar hulle tot by die Limpoporiviermonding en ongeveer 85 km daarvandaan ontmoet hy vir die eerste keer swart mense wat waarskynlik 'n Tsonga-stam was wat noord van die Limpopo geleef het. Omdat die mense so vriendelik was, het Da Gama die streek 'Die land van goeie mense' genoem en kort daarna verneem van 'n magtige swart ryk in die binneland - vermoedelik Zimbabwe van vandag. ¹⁵
- Middel-Februarie 1498: Die skepe bereik die mond van die Zambezirivier waar hy Moslems (aanhangers van die Moslem-geloof) teëkom. ¹⁵



- Februarie 1498: Vasco was bang dat die mense van [Mosambiek](#) vyandig teenoor 'n Christen sou wees en daarom vermom hy homself soos 'n Arabiese handelaar. Toe hy dit nie regkry om 'n geskikte geskenk aan die **sultan** (koning) van Mosambiek te gee nie, het die inwoners agterdogtig begin raak. Vasco en sy bemanning moes uit Mosambiek vlug uit vrees vir

hul lewe. Hierna vertrek die ekspedisie na Mombasa in Kenia. ²⁰

- Later in Februarie 1498 land Vasco in Malindi, noord van Kenia. Hier neem hy Ibn Majid, 'n skeepshandelaar met baie ervaring, in diens om hom raad te gee sodat die ekspedisie suksesvol afgelê kan word. Die vloot kom op 20 Mei 1498 in Kalikoet, Indië, aan.



Vasco da Gama, medalje in die klooster van Belem

- Binne slegs 10 maande het Vasco da Gama en sy bemanning iets reggekry wat geen Europeër voorheen kon doen nie – die vind van 'n handelsroete tussen Europa en Indië. Die koning van Kalikoet was egter nie beïndruk met Vasco se geskenke nie en beveel dat geen goud of ander kosbaarhede saam met Vasco da Gama na Portugal geneem mag word nie. ¹⁶
- Op pad terug sterf sy broer Paulo en Vasco begrawe hom eers voordat hy eindelijk op 29 Augustus 1499 in Lissabon aankom. Hier kry hy 'n heldeontvangs en word met verskeie toekennings vereer, onder meer ridderskap.
- Hoewel Vasco da Gama in sy doel met die reis geslaag het, is 'n duur prys betaal. Slegs twee van die vier skepe en 54 van die oorspronklike 170 matrose het na Portugal teruggekeer. Die meerderheid (insluitend da Gama se broer), het aan siektes soos skeurbuik gesterf. ²¹



Da Gama se tweede en derde reis

In 1502 onderneem Da Gama 'n tweede reis na Indië met 'n **vloot** bestaande uit 20 gewapende skepe. Met sy aankoms in Kalikoet, vind Da Gama uit dat die Portugese burgers wat hy by die handelspos gelaat het, vermoor is. Hy besluit om eerder na Kochi te gaan waar hy hartlik ontvang is. Uit **weerwraak** val hy alle Arabiese en Indiese skepe aan wat sy seeroete kruis. ¹⁴



Nagligte op die Lissabon-brug. Die Vasco da Gama-brug is 'n landmerk, en een van die langste brûe in die wêreld

Da Gama het nie soos ander ontdekkingsreisigers baie oor sy reise geskryf nie, maar uit stukkies inligting kan afgelei word dat hy mense nogal wreed behandel het. Hy word deur geskiedkundiges as een van die **hardhandigste** ontdekkers beskryf. Tydens sy tweede reis het daar **skermutselings** (gevegte) tussen Da Gama se skepe en Arabiese handelaars in Kalikoet uitgebreek.



Da Gama se graf

Da Gama het wraak geneem deur 30 ongewapende plaaslike vissermanne te onthoof (hul koppe afgekap), hul liggame in stukke te sny en dit in die see te los sodat die strome die lyke op die strand uitspoel. Hy het ook 'n skip **onderskep** wat Moslem-gesinne vervoer het wat van 'n godsdienstige **pelgrimstog** na Mekka in hedendaagse Saoedi-Arabië teruggekeer het. Da Gama het die passasiers in die skip se **romp** toegesluit, en ondanks **pleidooie** van bemanningslede, het hy die pelgrimskip aan die brand gestee. Honderde mans, vroue en kinders het gesterf.

[22](#)



Vasco da Gama se graf

Da Gama keer in 1503 na Portugal terug waar hy vir 20 jaar rustig gewoon het. In 1521 het koning Johan III die **troon bestyg** en Da Gama eers 'n raadgewer en later onderkoning (viceroy) gemaak. ²

Da Gama vertrek in April 1524 op sy derde reis na Indië. Hy doen egter **malaria** op en sterf op 24 Desember 1524. Hy is eers by die St. Francis-kerk in Kochi, Portugal, begrawe, en later in Vidigueira herbegrawe in 'n kis wat met goud en juwele versier is. ²



Da Gama se liggaam is oorspronklik in hierdie kerk begrawe, maar na veertien jaar is sy oorskot na Lissabon verskuif

Woordbank

aardrykskundiges	Wetenskap waarin die aarde beskryf word; geografie. ²⁹
anker	Swaar ystervoorwerp met arms en kloue wat gebruik word om 'n skip op een plek te hou. ²⁴
astronome	Iemand wat die hemelliggame (planete/sterre) bestudeer; sterrekundige. ²⁴
baai	Inham van die see/meer. ²⁴
belasting	Verpligte betaling aan die staat of ander owerheidsliggame om uitgawes te dek. ²⁴
bemannig	Offisiere en matrose van 'n skip of dienspersoneel van 'n vliegtuig. ²⁴
bevelvoerder	Offisier wat die bevel voer; aan die hoof van byvoorbeeld 'n militêre eenheid staan. ²⁴
bruidskatte	Geld of goed wat 'n vrou in die huwelik inbring. ²⁴
bevaar	Op die see vaar. ²⁴
diverse	Etlike, verskeie, verskillende. ²⁴
ekspedisie	Lang, deeglik beplande reis, veral na 'n onbekende/gevaarlike plek. ²⁴
fort	'n Gebou of mure wat om 'n dorp of stad gebou word om te keer dat vyande inkom. ³⁰
geesdrif	Entoesiasme, gretigheid, opgewondenheid. ²⁴
gevorderde	Bo skoolvlak; moeilik, kompleks; moeilik om te verstaan. ²⁴
jaar toet	Toentertyd; lank, lank gelede. ²⁴
handel	Die koop en verkoop van noodsaaklikhede en bruikbare goedere. ²⁴

handelspos	'n Handelspos is 'n plek waar handel (koop, verkoop en ruil van goedere en/of geld) plaasvind. Die pad tussen verskillende handelsposte word 'n handelsroete genoem. ³¹
handelsroete	Roete/weg waarlangs die handelsverkeer van 'n land of tussen verskillende lande plaasvind, oor land, op riviere, oor die see of deur die lug. ²⁴
hardhandigste	Kwaai, wreed, ongenadig. ²⁴
kartograwe	Iemand wat kaarte teken. ²⁴
kartografie	Kuns om landkaarte te teken; kaartkunde.
karveel	'n Klein, ligte skip wat deur seevaarders tussen die 15de en 17de eeu gebruik is. ²⁴
kolonisering	Gebied waar 'n groep hulle in 'n nuwe land gevestig en 'n gemeenskap gevorm het. ²⁴
kontinent	Vasteland. ²⁴
krete	Hard skree; Luidrugtige toejuiging; ²⁴
lospryse	Vrykoopgeld, loskoop, afkoop. ²⁴
kommoditeite	Handels- of verbruiksartikel; iets wat verkoopwaarde het. ²⁴
krater	Groot gat of ronde tregtervormige opening. ²⁴
malaria	Koors veroorsaak deur die byt van 'n <i>Anopheles</i> -muskiet; moeraskoors. ²⁴
matroos	Seeman, veral een van die laagste rang. ²⁴
moesonwinde	Moesonwinde word veroorsaak deur 'n seisoenale verskuiwing in die winde. Die winde skuif omdat die temperatuur van die land en die temperatuur van die water verskil soos seisoene verander. Dié wonde is gewoonlik swaar van vog wat uit die see verdamp het. ²⁴
navigasie	Die kuns (studie) om 'n voertuig van een punt na die ander te stuur (beweeg). ²⁴

onderskep	Iemand of iets verhinder om voort te gaan na sy bestemming. ²⁴
ontdek	Iets vind wat nog altyd daar was, maar waarvan niemand voorheen geweet het nie. ²⁴
pelgrimstog	Iemand wat na 'n heilige plek reis om daar te aanbid; bedevaartganger. ²⁴
peperduur	Besonder duur, byna onbekostigbaar. ²⁴
pleidooie	Om te pleit, soebat of smEEK vir iets. ²⁴
regstreekse	Direk, reguit; sonder tussenpersone of 'n omweg. ²⁴
ridder	'n Persoon kry die titel (soos 'n naam) van 'n ridder nadat hulle 'n diens aan die koning of die kerk gelewer het. Nadat Vasco da Gama se pa 'n diens aan die Portugese koning gelewer het deur 'n soldaat te wees, het hy ridderskap verwerf. Betaling sou dikwels grond wees wat die ridder van die koning ontvang. ²⁴
romp	Binneste ruim van 'n skip. ²⁴
seerowers	Iemand wat van roof (steel) op see leef. ²⁴
seevaartskool	Vlootkollege, -gimnasium of -akademie waar seevaartkunde en navigasie onderrig word. ²⁴
skermutselings	Botsing of geveg tussen vyande. ²⁴
skeurbuik	Siekte gekenmerk deur aandoening van die tandvleis en derms, veral onder matrose, as gevolg van 'n gebrek aan vars voedsel; gebrek aan vitamien C. ²⁴
stuurman	Skeeps-offisier wat 'n skip stuur; navigasie-offisier. ²⁴
sultan	Moslemkeiser, opperheer, gebieders in die Ooste. ²⁴
touwys gemaak	Iemand leer, inlig of wenke gee. ²⁴
troon bestyg	Koning word, aan bewind kom. ²⁴

verkenningsogte	'n Reis wat onderneem om kennis te probeer kry van die ligging van 'n terrein, vreemde land, roete, ensovoorts. ²⁴
vloot	Versameling van 'n aantal skepe wat saam vaar, bymekaarhoort. ²⁴
waardevolle	Kosbaar. ²⁴
weerwraak	Wraak neem op iemand wat jou 'n onreg aangedoen het; vergelding. ²⁴
welgestelde	Ryk, oorgenoeg besittings en geld hê. ²⁴
wins	Ekstra geld wat jy maak deur iets te verkoop nadat jy al jou onkoste betaal het. ²⁴

Lees hierdie om meer te leer oor Vasco da Gama

- [Kyk hoe vinnig jy die name van al die ontdekkers kan kry](#)
- [Meer oor seerowers en hoe die lewe op 'n skip was](#)
- ['n Interaktiewe manier om meer van ontdekkingsreisigers te leer](#)
- [Só lyk ons eie speseryroete in die Wes-Kaap](#)

Kyk hierdie video's om meer te leer oor Vasco da Gama

'n Kort opsomming van Vasco da Gama se lewe

Waarom het die ontdekkingsreisigers kruise opgesit?

'n Skeepswrak van een van Vasco da Gama se skepe: